



PRIHATIN terhadap komuniti luar bandar khususnya masyarakat Orang Asli, Universiti Putra Malaysia (UPM) menerusi Jabatan Kejuruteraan Awam, Fakulti Kejuruteraan menjalankan inisiatif murni dengan melaksanakan projek pembinaan dua rumah di Kampung Kachau Luar, Semenyih, Selangor.

Projek yang mendapat kerjasama daripada Ahmad Zaki Resources Berhad (AZRB) dilaksanakan bagi memberi peluang kepada penduduk terbabit untuk hidup lebih selesa dengan kemudahan asas lebih baik.

Penyerahan kunci rumah tersebut disempurnakan Timbalan Naib Canselor (Jaringan Industri dan Masyarakat) UPM, Prof. Dr. Ing. Ir. Renuganth Varatharajoo dalam satu majlis khas di kampung tersebut baru-baru ini.

Hadir menyaksikan penyerahan adalah Pengarah Jabatan Kemajuan Orang Asli (Jakoa) Selangor, Jamalludin Kasbi, Pengurus Besar Kanan AZRB, Wan Fakhru Anwar Wan Zakaria dan Tok Batin Kampung tersebut, Zainal Kilong.

Renuganth dalam satu kenyataan berkata,



RENUGANTH VARATHARAJOO (kanan) menyampaikan cenderamata kepada salah seorang penduduk Orang Asli yang menerima rumah baharu sambil diperhatikan Jamalludin Kasbi (kiri).

projek tersebut menterjemah hasrat universiti itu dalam memasyarakatkan universiti untuk kesejahteraan komuniti.

"Saya percaya projek ini bukan sahaja menampilkan peranan UPM dan AZRB dalam sumbangan terhadap pembangunan

komuniti, malah meningkatkan kefahaman pelajar mengenai sektor pembinaan yang berkualiti.

"Pada masa sama, usaha ini diyakini dapat melahirkan jurutera awam yang peka terhadap keselamatan manusia serta kelestarian alam

sekitar pada masa akan datang," katanya.

Sementara itu, Jamalludin berkata, projek itu dapat membuka peluang kepada masyarakat Orang Asli, universiti, industri serta agensi kerajaan berkongsi ilmu dari semasa ke semasa.

"Saya harap kerjasama ini dapat dimanfaatkan penduduk Orang Asli, sekali gus meningkatkan taraf hidup mereka untuk masa depan yang lebih baik," ujarnya.

Dalam pada itu, seorang penerima rumah, Zuriani Abdullah, 30, berkata, rumah yang disumbangkan itu akan memberi perubahan kepada dia dan keluarga, selain memberi mereka peluang hidup dengan lebih selesa.

"Rumah lama mengalami kebocoran teruk. Apabila hujan, air akan masuk dan bertakung. Sumbangan ini membuatkan kehidupan kami sekeluarga lebih selesa," katanya.

Projek yang diketuai Pensyarah Kanan, Jabatan Kejuruteraan Awam, Fakulti Kejuruteraan, UPM, Dr. Syazwani Idrus itu bermula sejak September 2015. Kedua-dua rumah tersebut mengambil tempoh dua bulan untuk disiapkan.

Sejumlah RM42,000 diperuntukkan bagi menyiapkan rumah berkeluasan 700 kaki persegi dan dilengkapi tiga bilik tidur, ruang tamu serta dapur itu. - AL FAIZAL/UPM

Bina kediaman untuk Orang Asli

